

68. ALDIZKARIA - 1999ko maiatzaren 31a

• II. NAFARROAKO TOKI ADMINISTRAZIOA

○ - E T X A U R I

Irekitzeko lizentzien tasak arautzen dituen ordenantza fiskala

Oinarria

1. artikulua. Nafarroako Toki Administrazioari buruzko uztailaren 2ko 6/1990 Foru Legearen 180. artikuluan eta hurrengoetan, hala nola Nafarroako Toki Ogasunei buruzko martxoaren 10eko 2/1995 Foru Legearen 100. artikuluan eta hurrengoetan xedatutakoaren babesean ezarri da ordenantza hau.

Zergagaia

2. art. Industriako edo merkataritzako establezimenduek, osasun, lasaitasun eta osasungarritasun baldintzak, hala nola haien funtzionamendu normala erregulatzeko indarra duten bertzelako arauetan ezarritako gainerakoak betetzen dituzten ala ez egiaztatzeko, irekitzeko lizentzia eman aurretik Udalak egiten dituen jarduera tekniko eta administratiboen ondorioa da zergagaia.

3. art. Aitzineko artikuluan aurreikusitako ondorioak bete daitezten, irekitezat hartuko dira ondoko hauek:

a) Jarduerak hasteko establezimendua berritik paratzea.

b) Establezimenduko jarduera aldatu edo handitzea, titularra aldatzen ez bada ere.

c) Establezimendua handitzea eta bertan ordenantza honen 2. artikuluan ezarritako baldintzetan eragina duen bertze edozein aldaketa egitea, horren ondorioz baldintzak berriz egiaztatu beharko direla.

4. art. Industriako edo merkataritzako establezimendutzat hartuko dira, bakarrik, etxebizitza ez izateaz gain, ondoko baldintza hauek betetzen dituzten eraikin edo instalazio guztiak, jendearendako irekiak izan edo ez:

a) Enpresa, fabrikazio, artisautza, eraikuntza, merkataritza edo zerbitzuetako jarduera bati lotua egotea.

b) Aipatu jarduera horiek egin gabe ere, haien lagungarriak edo osagarriak izatea, edo haietatik etekinak edo probetxamenduak ateratzea.

5. art. Zergadun diren aldetik, tasaren subjektu pasiboak hauek dira: ordenantza honen 4. artikuluan aipatutako establezimenduren bat zuzenean ustiatzen duten pertsona fisiko edo juridikoak eta, nortasun juridikorik izan gabe ere, unitate ekonomiko bat edo ondare bereizi bat osatzen duten entitateak.

6. art. Zergadunaren ordezkioak izanen dira establezimendu edo lokal horien jabeak, eta horiek, behar balitz, egiten den edo egiteko asmo den jardueraren titularrei pasatzen ahalko dizkiete kuota.

Zerga-oinarria

7. art. Jarduera ekonomikoen gaineko zergen urtean zer kuota dagokion, huraxe izanen da tasaren zerga-oinarria.

Tributu-kuota

8. art. Tributu-kuota kalkulatzeko, hurrengo artikuluan ezarritakoaren arabera dagokion tarifa aplikatuko zaio zerga-oinarriari.

9. art. Tributu-kuota zehazteko, ondoko tarifa hauek aplikatuko dira:

1.-Berritik paratzen diren establezimenduak.

Aurrekontu osoaren ehuneko 1 ordainduko dute, eta gutenez ere 15.000 pezeta.

2.-Handitzeak edo sailkapen aldaketak.

a) Establezimenduak berritik paratzeak eta merkataritza jarduerak handitzeak tarifa berdinak izanen ditu, eta gutenez ere 15.000 pezeta.

b) Jardueran aldaketak egiteak establezimenduak berritik paratzeko eta handitzeko ataletan ezarri bezalako tarifak izanen ditu, eta gutenez ere 15.000 pezeta.

3.-Titulartasun aldaketak, lagapenak edo negozioaren eskualdaketak: 15.000 pezetako zenbateko finkoa.

Sortzapena

10. art. Tasa eta ordaintzeko obligazioa sortuko dira zerga-gaia osatzen duen udal jarduera egiten denean.

11. art. Establezimendua behar den lizentzia eskuratu gabe irekitzen baldin bada, tasa sortuko da establezimenduak behar diren baldintzak betetzen dituen egiaztatze udal jarduera egiten denean. Hori guztia, establezimendua irekitzeko baimena eman edo, irekiera baimendu ezina balitz, hura ixteko dekretatzeko ireki litekeen administrazio espedientea deusetan ukatu gabe.

Behin sortuta, ordaindu beharrari ez dio inola ere eraginen eskatutako lizentzia ukatzeak edo onartzeak, establezimenduaren ezaugarriak aldatzeko baldintzapean, ezta, lizentzia emandakoan, eskatzaileak uko edo atzera egiteak ere.

Kudekaeta arauak

12. art. Lizentzia erdiesteko interesa duenak behar den eskabidea aurkeztuko du Herriko Etxean, egin beharreko jarduerak) eta dagokion lizentzia fiskalaren epigrafea zehazten dituela; eskabidearekin batera, lokalaren alokairuaren kontratua edo erosketaren titulua, hala nola tributu-kuotaren likidazioa egiteko behar duen informazio guztia aurkeztuko du.

Arau-hauste eta zehapenak

13. art. Iruzurtzat hartuko dira arau-hauste berezi hauek:

- a) Lokalak irekitzea behar den lizentzia erdietsi gabe.
- b) Zerga-oinarria zehazteko behar diren datuak gezurrezkoak izatea.

Bertzelako arau-hausteetarako ordenantza fiskal orokorrean xedatutakoari jarraituko zaio, edo bertzenaz, Nafarroako Toki Ogasunei buruzko martxoaren 10eko 2/1995 Foru Legeari eta harekin bat datozen araei.

14. art. Arau-hausteei dagozkien zehapenak, ordenantza fiskal orokorrean, Nafarroako Toki Ogasunei buruzko martxoaren 10eko 2/1995 Foru Legean eta harekin bat datozen arauetan erregulatzen dira.

AZKEN XEDAPENAK

Lehenbizikoa.-Aurreikusi ez den orotan, toki entitate honek onetsitako Ordenantza fiskal orokorrean eta Nafarroako Toki Ogasunei buruzko martxoaren 10eko 2/1995 Foru Legean xedatutakoa aplikatuko da.

Bigarrena.-Ordenantza honek bere testu osoa Nafarroako ALDIZKARI OFIZIALEAN argitaratzen denean indarra hartu eta erabateko eragin juridikoa sortuko du.